

ARUBA 500-NOS PASADO-NOS CULTURA-NOS HISTORIA-NOS-NOS

Si scucha emisoranan ultimo dianan, mira television, lesa den corant, ta ripara cu tur cos ta draai rond di "Nos cultura, nos pasado, Aruba 500, Nos historia, nos papiamento, nos..., nos.....etc."

Mi ta sintimi bon ora mi scucha nos grandinan papia di nan experiancianan, tempo nan tabata mucha y a crece bira adulto.

Mi ta goza cada minuut, pasobra locual nan ta papia ta locual nan a pasa aden, locual nos no sa di dje, y locual nos ta siña di dje, ora scucha nan.

Mi ta masha encanta cu e programa di "Nos grandinan na palabra di Tele Aruba" pasobra aki bo ta scucha nos grandinan contando cosnan cu hopi di nos ta haci como si fuera nos sa di nan, y ta bin ripara cu nos no sa nada.

Ta di e grandinan aki nos mester siña.

E siman aki mi a mira e programa di "Dika y Shirley" na Tele Aruba, y na final mi tabata kier pa el a sigui henter anochi.

Tabata un programa bon presenta, pero cu tanto Dika como Shirley cu poco nerviosismo pa nan prome programa, sinembargo, nan a sali cu tur honor for di e programa aki.

Drs. Curet tabata masha cla den su splicacionnan y mi ta kere cu ningun hende por bisa cu nan no a siña hopi di dje e anochi aki.

Diadomingo awor e programa ta ser ripiti, y ta masha importante pa nos hobennan mira e programa aki y sigui e serie completo, pasobra mi tin entendi cu e ta sigui paso pa paso te cu nos tempo moderno y cu hopi entrevista relaciona cu nos pasado y historia di nos isla.

Un pabien na Dika cu Shirley pa e programa maraviyoso aki.

HISTORIA DI NOS ISLA

Ademas di nos grandinan cu ta papia di nos infancia, hubentud y experiancianan como adulto den e prome 30 of 50 aña di nan bida y di e siglo cu ta terminando aki, por scucha na emisoranan algun locutor y locutora, tambe oyentenan cu ta papia riba nos pasado, nos historia, cu tin biaha bo ta haya gana di saca.

E oyentenan no ta nos grandinan si no mas bien hobennan cu ta expresando cosnan cu bo ta puntra ta di unda nan ta saca esaki.

Mester menciona aki cu hendenan cu a skirbi riba nos historia no a haci e trabao aki den un dia.

E hendenan aki a tuma añanan pa studia documentonan, copia e datonan y informacionnan, haci investigacionnan prome cu nan a yega na publica, y pa nos kibra nan bisando cu locual a wordo skirbi no ta verdad no ta corecto, siendo cu nos no a haci ningun investigacion pero djies a tende di Bubu y Chichi, esaki of esaya.

Tin bukinan skirbi cu historianan masha interesante di nos desarollo, no di e 500 añanan desde **Alonso de Hojeda**, pero tambe encuanto e formacion y bida di indiannan riba nos isla di miles di aña pasa, riba cualnan mi lo bini despues.

Esakinan ta bukinan masha interesante cu mi ta haya cu nos tur mester lesa y duna honor na nos hendenan cu a haci e investigacionnan -científico- aki, pasobra ta hopi pero hopi tempo, esfuerso y sacrificio ta bay den e investigacionnan aki y no ta asina asina ta publica encuanto historia sin cu tin referencianan.

Tin hendenan cu a haci estudionan, pero cu no a publica, pero cu ta conoci pa ta conocedoran di nos historia.

Hopi no sa, pero **alumnonan di IPA** a haci investigacionnan masha valioso riba tereno di nos historia, y riba esaki tambe mi lo bini despues.

Nan a habri caminda pa hopi cu kier haci investigacionnan pa por publica mañan.

Masha bunita ta pa mira tur dia na nos Archivo Nacional hobennan di diferente school cu ta bin haci investigacion riba un of otro tereno di nos historia y admira e entusiasmo cu cual nan ta traha.

E empleadonan, director **Drs. Raymond Hernandez**, **Drs. Henk Ooft**, y otronan di e departamentu aki, cu ta tuma nan tempo pa dirigi e bishitantenan aki y duna lo maximo na cooperacion.

Nos tin un "Diamante Bruto" den e archivo aki, cu hopi di nos por "Slip y pone briya mas ainda" pa futuro.

NOS FOLKLORE Y MUSICA

Awe por ehemplo lo tuma lugar na Trappers Club pa di cuater biaha e "Festival Un Canto na Nos Himno y Bandera".

Pa mi personalmente, e ta un di e festivalnan di mas bunita di nos isla, y na mes momento un festival cu ta enriquece nos cultura musical cu composicionnan nobo.

For di cada un di e festivalnan te awor a sali algun cancion cu den futuro lo ta clasiconan di nos musica, y pa e aña aki ta ser spera cu lo tin composicionnan cu lo bira hit grandi y cu pa futuro tambe lo ta forma parti di e coleccion clasico.

E bunita ta cu tin un variacion di ritmo cu por scucha y tur dedica na nos himno y bandera, y tin ora riba algo tipico social di nos isla,

sinembargo, nan ta di nos.

Awe nochi ta un anochi cu lo no mester tin **NI UN** asiento bashi den Trappers Club y aña pa aña a keda demostra caba cu esaki (fuera di e festival di Dande) ta e festival mas popular di nos isla ora cu nos kier papia di nos musica.

Ta e festival aki ta unda nos lo kier mira den futuro tambe un **Quasi**, un **EQO**, un **OREO**, un **Robert y su Solo Banda Show**, un **TIGO**, un **DREAM**, un **SILANZ**, un **CLIMAX**, entre otronan tocando nos **WALS**, nos **DANZA**, nos **MAZURCA**, nos **POLCA**, nos **TUMBA**, nos **TAMBU**, nos **FOX**, nos **Veneciano** (baila solamente pa grupo di **Sr. Mimi Kock** te ainda,) nos **Cuadriya**, nos **Marcha**. (2 ritmo cu a bay den olvido pero cu lo por trece back..)

Bandanan musical cu nos kier mira grabando por lo menos 3 di e ritmonan riba cada CD.

Den e festival aki nos ta haya te awor nos Tipiconan cu nan composicionnan nobo, pero mester corda cu otro agrupacionnan musical tambe por interpreta e ritmonan aki y enriquece nos coleccion di musica **PROPIO**.

RADIO EMISORANAN A CUMINZA CAMBIA

Por a nota cu ultimamente tin emisoranan radial cu a cuminsa haya caminda pa "aprecio pa nos musica".

Poco poco **Canal 90** (**Victor Pietersz** sigur pa hopi tempo caba na Voz di Aruba) ta dunando aprecio na nos musica.

Radio Kelkboom ta e unico emisora cu diariamente tin su oranan special pa nos musica. (nan **Butishi di Alegria di Ito y Eddie** ta esun cu ta marcando paso den su existencia).

Top FM a cuminsa dedica mas y mas atencion na nos musica, y ta bunita pa scucha e variacion cu tin awor caminda nos musica ta biniendo na **PROME LUGAR** na e emisora aki.

Radio 1270 y MI FM tin su programanan special riba nos musica y por tende e variacionnan-continuamente awor, mescos cu **Radio Revolution** cu ta moviendo den e direccion aki mas y mas y cu programa unita di **Jossy Herrera** dedica na nos musica.

Te ainda sinembargo, no ta suficiente.

Mester yega e dia caminda nos por scucha pa cada grabacion di exterior, por lo menos 3 grabacion di nos musica toca prome of despues.

Cu tur e grabacionnan di ultimo diez añanan, tanto riba disco, como riba cassette y riba CD nos por a yega cerca di e logro aki caba.

Awe nochi den e Festival di Harry Croes, lo sali mas o menos 50 cancion nobo.

Di esakinan sigur un 20 lo ta di nivel pa grabacion riba CD. E otronan sigur ta cancionnan cu mester conserva y no laga nan bay perdi manera centenares di nos cancionnan a bay perdi ultimo 20 pa 30 aña.

Laga nos yena Trappers awe nochi, y mustra aprecio na nos compositornan, nos areglistanan, nos cantantenan y nos musiconan, kendenan lo homenagea no solamente nos himno y nos bandera, pero lo homenagea na mes momento nos cultura musical.

NOS PAPIAMENTO CU TA WORDO DAÑA

Sr. Titi Davelaar tin añanan ta critica y comenta riba nos papiamento cu ta wordo dañá dia pa dia riba nos isla. E ta duna hasta ehemplo con pa skirbi cierto palabranan of frasenan y mustra riba fayonan den nos gramatica.

Nos tur diariamente ta comete masha error den nos skirbimento, y nos papiamento, pero ora cu tin coregi of ora cu nos wordo mustra riba errornan, nos mester acepta tambe y coregi tambe.

Hopi di nos locutornan hoben cu tin programanan hubenil na radio, mester cuminsa na pone mas atencion riba **NOS** papiamento.

Nos mester stop di "masacra, mutila, trapa, maltrata" nos idioma. Nos no mester kere cu pasobra nos ta papia Papiamento, nos conoce nos **IDIOMA**.

E tambe tin su vocabulario, e tambe tin su gramatica y nos mester siña skirbi Papiamento, mescos cu nos mester siña skirbi tur otro idioma. No ta pasobra nos ta papia Papiamento, nos sa Papiamento.

PAPIA nos idioma corectamente y **SKIRBI** nos idioma corectamente, usando palabranan na **PAPIAMENTO**, ta tres diferente cos.

Loke nos mester stop di haci tambe,-- principalmente na radio y television ta ripara esaki--, ta di stop di usa palabranan **GRANDI** cu nos no sa nan significacion of nan **USO**, esta ki ora ta usa cierto palabranan.

Esnan cu sigur ta masacra nos papiamento ta **POLITICONAN** cu nos ta scucha tur dia den programanan di yamadanan telefonico na radio.

Ta net e politiconan ta e personanan cu ta usa palabranan cu tur hende ta tuma den nan vocabulario despues, usa tur equivoca cu tin, y kere cu nan ta expresando nan mes corectamente.